

**KANTONALNA
PRIVREDNA
KOMORA TUZLA**

**BROJ 11 i 12/15,
novembar/decembar
2015. godine**



KOMORSKI INFORMATOR

Sretna Nova Godina



**UPRILIČEN "DAN
SA TRGOVINSKIM
SAVJETNIKOM"**



**DONGFANG ELECTRIC
STRATEŠKI PARTNER**



**DŽAMBIĆ: "OMEGA
JE BREND I TAKO ĆE I
OSTATI!"**



**NOVI BREND „AJNA VODA“
NOVA ČLANICA KOMORE**

Komorski informator

Uvod

Poštovani čitaoci!



Kraj godine, posljednja dva mjesec, kao po poravilu su već određena za najviše aktivnosti, zaključivanje i sumiranje svega urađenog tokom godine. Tako je i u Komori u kojoj su održane brojne sjednice odbora komorskih udruženja, sa zanimljivim temama, prezentacijama, dogovorimo, raspravama, zaključcima.

Puno je toga zanimljivog u posljednjem izdanju Komorskog informatora za 2015. godinu a uvijek se nešto mora i treba izdvojiti.

Tako izdajamo dvije značajne posjete, prvo, Kantonalnu privrednu komoru Tuzla posjetio je Began Muhić, novoimenovani generalni konzul Bosne i Hercegovine u Turskoj koji smatra da saradnju sa Turskom treba podići na viši nivo. Druga posjeta, ništa manje značajna, bila je ona trgovinskog savjetnika u ambasadi Austrije koji je razgovarao sa privrednicima, sve sa željom da se unaprijedi poslovna saradnja između privrednika Tuzlanskog kantona i Austrije.

Vrlo značajne i za Tuzlanski kantona i za Bosnu i Hercegovinu su aktivnosti koje se u RMU Banovići pokreću vezano za izgradnju termoelektrane i cementare. U firmi "Omega" su na dostojanstven, profesionalan i evropski način obilježili 15 godina saradnje sa turskim partnerima i 15 uspješnih godina razvoja Beko brenda u Bosni i Hercegovini. Na tržištu se pojavilo nekoliko novih brendova a raduje da su iz firmi koje su članice Komore. Jedna je već u Komori nekoliko godina i izbacuje na tržište Konopljino ulje, a druga je odmah po pokretanju izvorišta postala članicom i izbacila na tržište novu vodu "Ajna". Trebaće im puno podrške i sreće a zaovo prvo, vrata Komore su otvorena. Ureda za izdavanje ATA karneta kontinuirano izdaje dozvole, porastao je broj članica Komore, pratimo aktivnosti Vlade TK. Naravno, ne bi novina bila to što jeste da nema bar jedan zapis o sajamskim aktivnostima. Bili smo na sajmu privrede u Brčkom, predstavili naše članice a najavljujemo i dva sajma u narednoj godini.

A u narednoj godini, svima vama, čitaocima Komorskog informatora, članicama Komore, poslovnim partnerima, svima u komorskom sistemu regije, uz želje da očuvamo i ojačamo sistem, želimo puno lične i poslovne sreće i uspjeha. Sretno nam svima bilo u 2016. godini, a kako stvari stoje, sreća će nam najviše trebati...

Dino Kalesić
gl. i odg. urednik





Komorski informator Sadržaj

KANTONALNA PRIVREDNA KOMORA TUZLA

KOMORSKI INFORMATOR
BROJ 11 i 12/15,
novembar/decembar
2015. godine

IZDAVAČKI SAVJET:

1. Nedret Kikanović, član
2. Mirsad Kukić, član
3. Bajazit Jašarević, član
4. Suad Selimović, član
5. Nurudin Žunić

REDAKCIJSKI KOLEGIJ:

1. Nedret Kikanović, član
2. Esad Arnautović, član
3. Nurudin Žunić, član
4. Suad Selimović, član

IZDAVAČ:

Kantonalna privredna
komora Tuzla

GL. I ODGOVORNI UREDNIK:

Dino Kalesić

TEHNIČKA PRIPREMA, REPRO I ŠTAMPA:

GRIN d.o.o. Gračanica

ZA ŠTAMPARIJU:

Adnan Imerović, direktor

TIRAŽ:

500 primjeraka.

ADRESA:

Trg slobode bb
e-mail: kpktz.ba@bih.net.ba
<http://www.kpktz.ba>

	UPRILIČEN "DAN SA TRGOVINSKIM SAVJETNIKOM"	4
	PRIVREDNU SARADNJU SA TURSKOM PODIĆI NA VIŠI NIVO	5
	RAZGOVOR O SARADNJI RMU BANOVIĆI I DONGFANG ELECTRIC	6
	DONGFANG ELECTRIC STRATEŠKI PARTNER	7
	REGISTAR POSLOVNIH SUBJEKATA TUZLANSKOG KANTONA	8
	RASPRAVA O IZRADI STRATEGIJE RAZVOJA INDUSTRIJE GRAĐEVINSKOG MATERIJALA U FBiH	9
	DEFINISANE MJERE ENERGETSKE EFIKASNOSTI ZA 973 ZGRADE U TK	10
	RAZMATRANA AKTUELNA PROBLEMATIKA – TRGOVINA, UGOSTITELJSTVO I TURIZAM	11
	DŽAMBIĆ: „OMEGA JE BREND I TAKO ĆE I OSTATI!”	12
	NOVI BREND „AJNA VODA“ – NOVA ČLANICA KOMORE	13
	FORMIRANA GRUPA ZA ZAKLJUČKE	14
	PORTANATURAE: ULJE OD KONOPLJE NA BH I EU TRŽIŠTU	16
	“PRIVREDA TK” NA SAJMU U BRČKOM	17



Saradnja Komore i Austrijske ambasade u BiH...

Upriličen "dan sa trgovinskim Savjetnikom"

Želja da se unaprijedi poslovna saradnja između privrednika TK i Austrije

Kantonalna privredna komora Tuzla i Austrijska ambasada u Bosni i Hercegovini organizovali su "Dan sa trgovinskim savjetnikom". Sigmund Nemeti trgovinski savjetnik Austrijske ambasade u Bosni i Hercegovini razgovarao je sa privrednicima, predstavnicima firmi članica Kantonalne privredne komore Tuzla a sve sa željom da se unaprijedi poslovna saradnja između privrednika Tuzlanskog kantona i Austrije. Bila je ovo prilika za sve privrednike sa područja Tuzlanskog kantona, a koji žele poslovati sa Austrijom, da pripreme konkretne projekte i planove za poslovnu saradnju sa austrijskim privrednicima, da predstavljaju svoje potencijale i projekte, da pokušaju iskoristiti ovu priliku za pronalazak novih poslovnih partnera. Trgovinski savjetnik je bio na raspolaganju svim privrednicima koji su izrazili želju za poslovanjem sa privrednicima iz Austrije, a kako je istakao na skupu, učinit će maksimalne napore kako bi im omogućio da putem trgovinskog odjela Austrijske ambasade uspostave kontakte sa potencijalnim poslovnim partnerima. **"Drago nam je da smo razgovarali sa privrednicima sa područja Tuzlanskog kantona. Uvijek nam je cilj sagledati mogućnosti saradnje naših kompanija sa firmama iz ovog regiona. Već postoji značajan broj kontakata, značajne firme iz Austrije već posluju sa firmama iz Tuzlanskog kantona, općenito, veliki je broj firmi iz Austrije koje posluju u Bosni i Hercegovini. Naš zadatak je da takvu saradnju unaprijedimo, da se poveća broj firmi koje saraduju, razmjenjuju proizvode, iskustva, znanja, informacije. I u Komori Tuzla su bili veoma zanimljivi razgovori, ponuđeni su zanimljivi projekti i uvjeren sam da će se pronaći firme u Austriji koje će pronaći svoj interes u saradnji sa firmama iz Tuzlanskog kantona na realizaciji tih projekata"**, naglasio je Sigmund Nemeti trgovinski savjetnik Austrijske ambasade u BiH.



Već je od ranije poznato kako su najveće investicije na području Tuzlanskog kantona upravo iz Austrije. **"Temeljem tog saznanja mi smo upriličili ovakve privredne susrete jer je za očekivati da će se pronaći nova polja, novi projekti da se dosadašnja saradnja podigne na viši nivo. S tim u vezi, nas raduje dobar odziv privrednika koji su ponudili trgovinskom savjetniku projekte iz oblasti drvne i metalne industrije. Raduje i optimizam savjetnika Nemetija kada je u pitanju realizacija nekih od projekata, bio je prilično zadovoljan viđenim i ponuđenim a to**

ujedno možemo shvatiti i kao priznanje našim privrednicima jer se zna kako je austrijsko tržište zahtjevno, općenito, ne samo zbog činjenice da je to tržište Evropske unije sa veoma stogim EU standardima", istakao je Nedret Kikanović predsjednik Kantonalne privredne komore Tuzla.

ODRŽAN SEMINAR "PRISTUP FINANSIJAMA- PREPREKE I MOGUĆNOSTI"



U cilju pružanju konkretnih informacija o dostupnim finansijskim izvorima namijenjenim privrednicima u Bosni i Hercegovini, Sektor za edukaciju Vanjskotrgovinske komore Bosne i Hercegovine, u saradnji sa USAID-Sida GOLD Projektom i Kantonalnom privrednom komorom Tuzla, organiziran je seminar i panel diskusija na temu: "Pristup finansijama – prepreke i mogućnosti". Skup su otvorili Nedret Kikanović predsjednik Kantonalne privredne komore Tuzla, Duljko Hasić direktor Instituta za edukaciju (ECOS) Vanjskotrgovinske komore BiH i Saša Kolica iz USAID-Sida Gold projekta. Seminar/radionica na temu "Pristup finansijama – prepreke i mogućnosti" bio je prilika da se sa predstavnicima relevantnih institucija prodiskutuje o problemima sa kojima se preduzetnici susreću pri apliciranju na kreditna (i druga) finansijska sredstva. Amra Hadžijahić savjetnica za privatni sektor USAID-Sida Gold projekta govorila je o praktičnom primjeru pripreme i pisanja poslovnog plana a o iskustvu banaka i najčešćim greškama koje poduzetnici prave kod pripreme poslovnog plana govorili su predstavnici ProCredi Banke, Sberbank Tuzla i Nove Banke Tuzla. Direktor Hasić je u izlaganju pokušao dati odgovore na pitanja "Kako doći do sredstava za finansiranje biznisa" i "Šta su na tom putu najveće prepreke". U okviru radionice pripremljena je i prezentacija aktuelnih kreditnih linija poslovnih banaka za preduzeća i predstavnike lokalne zajednice koje su pripremili predstavnici Ziraak Bank BHm, Nova Banka Tuzla, Sberbank Tuzla, NERDA KGF Tuzla, a DCA garantni fond prezentirala je Esma Mustajbašić iz USAID-Sida Gold projekta.

D.K.



Posjeta gen. konzula Muhića Komori...

Privrednu saradnju sa Turskom podići na viši nivo

Veoma značajna posjeta Komori - Od juna traju pripreme za novu, izuzetno važnu funkciju
- Kvalitenije povezivanje privrednika - Približiti tursko tržište Bosni i Hercegovini -



Kantonalnu privrednu komoru Tuzla posjetio je Began Muhić, novoimenovani generalni konzul Bosne i Hercegovine u Turskoj. Nedret Kikanović predsjednik Kantonalne privredne komore Tuzla sa saradnicima i Began Muhić generalni konzul BiH u Turskoj, razgovarali su o stvaranjima uslova i mogućnosti za kvalitetniju privrednu saradnju Tuzlanskog kantona i Turske. Kada je u pitanju razmjena roba sa Turskom koja je među deset strateških država, situacija nije povoljna po Bosnu i Hercegovinu i sasvim je sigurno kako postoje brojne mogućnosti da se omjer izvoza i uvoza pokuša približiti. Raduje i činjenica da postoji i volje i želje obostrano, pa se tako već najavljuju novi poslovni iskoraci kojima će u prilog ići uspostava Cargo centra na Međunarodnom aerodromu Tuzla. „**Posjeta generalnog konzula Begana Muhića Komori je veoma značajna a posebno nas raduje da na tako važnu funkciju odlazi osoba sa područja Tuzlanskog kantona. Želja nam je da uspostavimo direktnu saradnju Kantonalne privredne komore Tuzla i našeg Konzulata u Istanbulu, a u cilju kvalitetnijeg povezivanja privrednih subjekata sa područja našeg kantona sa privrednim subjektima, poslovnim partnerima, potencijalnim investitorima u Turskoj**“, izjavio je Nedret Kikanović predsjednik Kantonalne privredne komore Tuzla.



Kako je istaknuto na sastanku, raduje podatak da je ostvarena saradnja određenih privrednih subjekata iz Tuzlanskog kantona sa turskim privrednicima i da je krajem prošle godine rezultirala izvoznim poslovima. Tu sem misli prije svega na firmu „Piemonte“ Tuzla i izvoz značajne količine mesa za Tursku. Najavljuje se proširenje te saradnje, uključenje i drugih privrednih subjekata u realizaciju izvoza još većih količina mesa iz Bosne i Hercegovine u Tursku za naredni period. Od juna ove godine a po odluci Predsjedništva Bosne i Hercegovine i imenovanja na mjesto generalnog konzula, traju pripreme za obavljanje važne funkcije u Istanbulu a za konzularne poslove Turske, Gruzije i Azerbejdžana. Pripreme i prikupljanje potencijalno korisnih informacija gen. konzul Muhić je shvatio veoma ozbiljno a Tursku vidi kao zemlju od posebnog strateškog značaja za BiH, što potvrđuje i podatak da je to zemlja sa kojom BiH ima najviše potpisanih bilateralnih sporazuma. „**Za mene je posjeta Kantonalnoj privrednoj komori Tuzla veoma važna sa aspekta prikupljanja informacija vezanih za privredu Tuzlanskog kantona ali i s aspekta otvaranja dijaloga o svim temama koje u narednom periodu treba aktualizirati. Moji zadaci na novoj, veoma značajnoj funkciji su, pored ostalog, pokušati veliko tursko tržište približiti privredi Bosne i Hercegovine. Moja lična obaveza je da to učinim za privredu Tuzlanskog kantona**“, izjavio je Began Muhić generalni konzul Bosne i Hercegovine u Turskoj. Pred privrednicima i diplomatijom je veliki izazov u vidu pokušaja plasmana bh proizvoda na veliko, kvalitetno i zahtjevno tursko tržište. Očekuje se da će Cargo letovi doprinijeti ovim nastojanjima, da će se poduzeti sve potrebne aktivnosti kako bi se privredna saradnja Bosne i Hercegovine, posebno Tuzlanskog kantona sa Turskom, podigla na viši nivo. Nedret Kikanović predsjednik Kantonalne privredne komore Tuzla je Beganu Muhiću generalnom konzulu BiH u Turskoj, zaželivši mu puno sreće u budućem radu, uručio publikaciju „Tuzlanski kanton - vaš poslovni partner“, nedavno realizovan komorski projekat koji podrazumijeva publikaciju namijenjenu potencijalnim investitorima a urađenu na bosanskom, engleskom, njemačkom i turskom jeziku.

D.K.



Iz Odbora Udruženja za energetiku, rudarstvo i industriju...

Razgovor o strateškoj saradnji između RMU „Banovići“ i kompanije Dongfang Electric Corporation Limited iz Kine o finansiranju i izgradnji bloka 1 Termoelektrane „Banovići“, snage 350 MW

U otvaranju sjednice Kazafer Bečić predsjednik Odbora Udruženja, dao je kratak osvrt na dosadašnje aktivnosti na izgradnji TE Banovići. Istaknut je i ovom prilikom veliki značaj angažmana domaćih firmi u projektu u procentu od 20%.



U prezentaciji pod nazivom „Strateški razvoj Rudnika“ Avdija Mumić iz RMU Banovići je naveo osnovne informacije o investitoru, početku masovne proizvodnje uglja, organizaciji, realiziranim investicijama te između ostalog podcrtao da je do kraja 2019. godine, a u cilju podizanja pogonske spremnosti, u planu nabavka opreme u vrijednosti od oko 125 miliona KM. Kako je istaknuto, u RMU Banovići je urađena kompletna Investiciono – tehnička i okolinska dokumentacija te niz drugih elaborata, studija i projekata s ciljem pribavljanja dozvola i odobrenja, a u toku je i priprema dokumentacije neophodne za kreditnu aplikaciju čime se zaokružuje postupak izbora Strateškog partnera te stvaraju preduslovi za početak gradnje. Ukupna vrijednost projekta će biti oko 495 mil EUR. Bilo je riječi i o izgradnji cementare, muzejskog i turističkog kompleksa, kamenoloma krečnjaka sa krečanom, fabrike građevinske opreme i poslovne zone te ukazao da će realizacija projekata u narednih pet godina omogućiti otvaranje oko 1250 novih radnih mjesta. Najviše se diskutovalo o učešću domaćih firmi u cjelokupnom projektu. Istaknuto je zadovoljstvo obezbjeđenjem 20% udjela u radu za domaće firme ali je rečeno kako bi taj procenat mogao biti i znatno veći jer za tako nešto postoje osnove, postoji znanje i kvalitet domaćih firmi. Važno je razmotriti da li projekt ima nekih administrativnih prepreka a za domaće firme je najbitnije definitivno potpisivanje ugovora odnosno klauzule ugovora koji štite domaće firme kako bi se pravovremeno i kadrovski i tehnički i pravno pripremili i na sve zahtjeve kvalitetno odgovorili. Zakonske odredbe omogućit će da se po dobijanju saglasnosti za građenje u pojedine radove može ući odmah na prijeće što je veoma značajno. Naglašeno je kako su obavljani složeni i detaljniji razgovori, da se teškom mukom uspjele izboriti za zaštitu domaćeg sektora a zahtijevat će se i dokaz o učešću

domaćih firmi u svakom dogovorenom segmentu. U narednim koracima je potrebno pokrenuti mehanizme kojima će se pratiti finansijske tokove projekta, mjere kojima će se kontrolisati nabavka potrebnih roba i materijala sa naglaskom na kupovinu domaćeg. U diskusiji se razgovaralo i o iskustvima sa kineskim investitorom u projekat “Stanari”, karakteru EPC ugovora, o definisanju poslova koji se nalaze u procentu namijenjenom domaćim firmama.



Bilo je predstavnika domaćih firmi na sastanku koji su nudili svoje usluge u projektu “cementare”, pohvala na adresu RMU Banovići za studiozan i profesionalan pristup projektu, zajedničkom interesu i rudnika i šire zajednica za angažmanom domaćih privrednih subjekata na svakom, pa i ovo projektu, neophodnosti kvalitetnog nadzora nad radovima. Istaknuto je da će biti raspisan međunarodni poziv za odabir pravnog subjekta koja će vršiti nadzor na svim elementima izgradnje. Nurudin Žunić, sekretar udruženja je sve predstanike firmi članica Udruženja, pozvao na aktivniji rad u komorskom sistemu, pogotovo u predstojećem investicionom ciklusu. Ukazao je na potrebu kvalitetnijeg uređivanja komorskog rada i sistema i u tom smislu, potrebu donošenja Zakona o privrednoj komori TK na partnerskoj osnovi sa, prije svega Vladom TK, koji će privredu staviti u fokus cjelokupnih zbivanja.

D.K.



Iz RMU Banovići...

Dongfang Electric strateški partner

Skupština RMU Banovići odobrila izbor Dongfang Electrica za strateškog partnera - Potpisani ugovori za izgradnju Termoelektrane u Banovićima – Izgradnja počinje sredinom naredne godine – Udaranje temelja energetskog sektora Bosne i Hercegovine za budućnost -



Skupština dioničkog društva Rudnici mrkog uglja "Banovići" d.d. Banovići, na novembarskoj sjednici je dala saglasnosti na predloženi izbor ponuđača Dongfang Electric Corporation Limited iz Kine za strateškog partnera za finansiranje i izgradnju Termoelektrane Banovići, blok 1-350 MW. Skupština je takođe, donijela odluku o davanju saglasnosti na Sporazum o strateškoj saradnji između RMU "Banovići" i Dongfang Electrica, kao i odluku o davanju saglasnosti na Ugovor o inženjeringu, nabavci i izgradnji (EPC-Ugovor po sistemu "ključ u ruke"), sklopljen 12.10.2015. godine. Prethodno su saglasnost za izbor strateškog partnera dali Vlada Federacije i Parlament FBiH. Prema najavama Munevera Čergića, generalnog direktora RMU "Banovići", izgradnja termoelektrane mogla bi početi polovinom iduće godine. Kako se očekuje, gradnja termoelektrane trajat će tri do četiri godine i trebalo bi da bude puštena u rad krajem 2019. godine.



POTPISANI SPORAZUMI I UGOVORI ZA IZGRADNJU TERMoeLEKTRANE U BANOVIĆIMA

Generalni direktor Rudnika mrkog uglja Banovići Munever Čergić potpisao je sa kineskim partnerima potpisao sporazume o implementaciji projekta gradnje Termoelektrane u Banovićima. Čergić je u ime RMU Banovići potpisao sporazum za stratešku saradnju sa Dongfang Electric Corporation Limited (DEC). Pored ovog ugovora potpisani su i: ugovor o inženjeringu, nabavci i izgradnji (EPC Ugovor) po sistemu "Ključ u ruke" za Termoelektanu Banovići, blok 1 – 350 MW između RMU Banovići" i Dongfang Electric Corporation Limited (DEC), te okvirni sporazum za finansiranje projekta izgradnje Termoelektrane Banovići, blok 1 – 350 MW između RMU "Banovići" d.d. Banovići i Industrijske i komercijalne banke Kine (ICBC).



"Okvirni ugovor koji je potpisan znači da se već naredne godine može krenuti u izgradnju Termobloka koji će zadovoljiti najviše evropske standarde. U pitanju su najnovije tehnologije i zapravo se na ovaj način udaraju temelji energetskog sektora Bosne i Hercegovine za budućnost. Time će se rješavati ekonomski problemi te problem zagađenosti gradova Banovići i Živnice a i problem grijanja ova dva grada bi mogao biti riješen. Realno bi bilo da se već naredne godine krene u izgradnju Termobloka", kaže izvor Novog vremena.

D.K.



Nova usluga Kantonalne privredne komore Tuzla...

Registar poslovnih subjekata TK

- Završna faza projekta - Nova usluga iz Komore Tuzla - Registar na web stranici Komore - Poziv firmama da dostave osnovne podatke -



Novi projekat Kantonalne privredne komore Tuzla, nova usluga svojim članicama i svim ostalim privrednim subjektima, u završnoj je fazi. Riječ je o Registru poslovnih subjekata Tuzlanskog kantona koji će biti dostupan na web stranici Komore: www.kpktz.ba. Ovom uslugom će se na jednom mjestu objediniti svi podaci o poslovnim subjektima na području Tuzlanskog kantona pa će svi zainteresovani prilično brzo i jednostavno moći dobiti sve osnovne podatke subjekata koji su u fokusu njihovog interesovanja. Pretragu je, stručni koji predvodi Jovan Dobrosavljev viši stručni saradnik za razvoj informacionih sistema Kantonalne privredne komore Tuzla, učinio vrlo jednostavnom i efikasnom. Na raspolaganju su tri mogućnosti pretrage podataka poslovnih subjekata sa područja Tuzlanskog kantona: po nazivu, po mjestu i po djelatnosti. Ujedno, iz Kantonalne privredne komore Tuzla je upućen poziv svim poslovnim subjektima, posebno firmama članicama Komore, da dostave osnovne karakteristike svoje firme, poslovnog subjekta, kako bi ih unijeli u Registar čime bi se usluga obogatila što većim brojem podataka. Informacije, odnosno, osnovne karakteristike firme mogu dostaviti putem maila na adresu: komora@kpktz.ba.

D.K.

Iz Udruženja za industriju tekstila, kože i obuće

Održana Sjednica Odbora udruženja

Razmatrana aktuelna problematika iz oblasti industrije tekstila, kože i obuće



I u Udruženju za industriju tekstila, kože i obuće kantonalne privredne komore Tuzla, održana je redovna sjednica Odbora. Članovi Odbora ovog komorskog Udruženja su se bavili aktuelnom problematikom iz oblasti iz nadležnosti Udruženja. Posebna pažnja se posvetila reformama u oblasti politike rada. Razmatrani su trenutno stanje i razvojni potencijali, te uticaj Zakona o radu i Prijedloga zakona o izmjenama i dopunama zakona o doprinosima na rad i zapošljavanje u ovoj industrijskoj grani. Privrednici su podržali usvojeni Zakon o radu, ali i skrenuli pažnju na značaj povlaštenog tretmana industrije tekstila, kože i obuće prilikom

utvrđivanja osnovice za obračun doprinosa, s obzirom da se radi o niskoakumulativnoj privrednoj djelatnosti koja zapošljava oko 40.000 radnika u Bosni i Hercegovini, uglavnom ženske, teško zaposlivo populacije. Razmatran je i Zakon o izmjenama Zakona o jedinstvenom sistemu registracije, kontrole i naplate doprinosa, posebno važan za tekstilce jer se tiče podizanja limita plaće na koju će se plaćati fiksna stopa doprinosa od 150 KM. Privrednici podržavaju ovaj potez, ali smatraju da ovim Zakonom trebaju biti obuhvaćene i firme koje proizvode vlastite domaće proizvode, a ne samo firme koje posluju po principu lohn poslova. S obzirom na prethodno navedeno i činjenicu da se radi o niskoakumulativnoj privrednoj grani koja upošljava veliki broj radnika, a u kojoj je na globalnom tržištu teško ostati konkurentan, upućen je zahtjev premijeru Federacije i Ministarstvu energije, rudarstva i industrije FBiH, u kojem se insistiralo da navedeni Zakoni industriji tekstila, kože i obuće osiguraju povlaštenu tretman kako je bilo i do sada. Pored pitanja koja se odnose na radno zakonodavstvo, razgovaralo se i o problemima naplate refundacije porodijskog bolovanja u Tuzanskom kantonu kao i nedostatku adekvatne radne snage za potrebe ove industrije. Istaknuta je važnost boljeg međusobnog povezivanja privrednika iz ove industrije, kako unutar Kantona, tako i iz drugih kantona a sve u cilju stvaranja što povoljnijih uslova poslovanja.

Edina Kurtić, sekretar Udruženja



Iz Udruženja za građevinarstvo i IGM...

Rasprava o izradi Strategije razvoja industrije građevinskog materijala u FBiH

Vlada F BiH (Ministarstvo industrije energetike i rudarstva) zajedno sa Privrednom komorom F BiH, kao nosiocem aktivnosti, u završnoj je fazi izrade ključnog strateškog dokumenta za razvoj industrije građevinskog materijala u F BiH - U završnoj fazi izrade je prva poslijeratna strategija razvoja građevinske industrije F BiH



Privredna komora F BiH je nosioc aktivnosti na izradi razvojne strategije industrije građevinskog materijala, koja u suradnji sa Ministarstvom industrije, energetike i rudarstva, te pismenoj, ali i direktnoj komunikaciji sa privredom, je došla do radne verzije ovog dokumenta. Prva javna rasprava po pripremljenom materijalu održana je u Sarajevu, nakon čega su objedinjene sugestije i prijedlozi prisutnih učesnika rasprave u radni tekst Strategije. U Kantonalnoj privrednoj komori Tuzla održana je II javna rasprava, sa ciljem da pripremljeni materijal još jednom bude izložen kritičkom osvrtu i analizi, te da se dođe do što kvalitetnijeg i praktično orijentiranog strateškog dokumenta za razvoj industrije građevinarstva.

Prisutni predstavnici privrede aktivno su učestvovali u raspravi po prezentiranom materijalu od starne predstavnika Ministarstva i Komore.

Pored predstavnika dvadesetak privrednih društava ove oblasti sa područja kantona Tuzla, raspravi su prisustvovali i uzeli aktivno učešće i predstavnici kantonalnog ministarstva energije, industrije i rudarstva, predstavnici građevinskog i rudarsko-geološkog fakulteta iz Tuzle...



Rasprava se ocjenjuje kao kvalitetan izvor i doprinos novih spoznaja u odnosu na ponuđeni sadržaj, čime su privrednici dobili i ostvarili mogućnost da aktivno učestvuju u izradi strategije IGM. Strategija razvoja IGM dio je strategije razvoja F BiH i predstavlja strateški pristup građevinarstvu kroz aktivnosti koje su utvrđene u jednom dugoročnom razvojnom dokumentu, kompetetno može da služi nadležnim organima i institucijama, kao i privrednim subjektima iz ove djelatnosti za definisanje dugoročne politike za razvoj građevinske djelatnosti. Značaj građevinarstva u širem smislu i njegova multiplikativnost na ostale prateće djelatnosti u potpunosti opravdava potrebu za tretiranjem jednog od strateških sektora razvoja ekonomije. Pod građevinskom industrijom podrazumijevamo čitav opus privrednih aktivnosti koje se objedinjuju i koje završavaju na nekom objektu i to apriori ne podrazumijeva samo proizvodnju građevinskog materijala i opreme nego jedan širi pojam uključujući i građenje. Građevinarstvo je jedna propulzivna, vioskoakumulativna i izvozna privredna grana i to su univerzalni atributi koje ono za sobom nosi. Razvoj industrije građevinskih materijala baziran na principa održivog razvoja, tretman i stepen konzumiranja energije, zagađenje prostora, reciklaža, subvencije države, zapošljavanje, obrazovanje...neke su stavke koje čine sadržaj ovog strateškog dokumenta. Forsiranje proizvodnje građevinskog materijala na bazi prirodnih resursa je bitan segment u oblasti građevinarstva koji osigurava dinamičnost, produktivnost i kreativnost ovog sektora.

Praktična implementacija Strategije razvoja građevinarstva zavisi od politika koje se implementiraju u Vladi, ministarstvima, lokalnoj samoupravi i opšte političke situacije u zemlji. Nemoguće je izbjeći politički utjecaj u razvoju građevinarstva i zbog toga je veoma važno da politika pravilnim odnosom i odgovarajućim odlukama doprinosi razvoju građevinarstva, prevashodno donošenjem odluka za razvijanje strateških projekata. Cilj ovog dokumenta je da istakne opće karakteristike i probleme sa kojima se suočava industrija građevinarstva F BiH, ali i da odredi namjeru države u ovoj oblasti, predloži mjere i aktivnosti koje se trebaju poduzeti kako bi svako privredno društvo ili pojedinac znali koji je putokaz i kuda treba da se kreće u svojim poslovnim namjerama, sa težnjom konačnog oporavka i napretka ove privredne grane.

mr.sc. Dženana Hodžić,
sekretar za građevinarstvo i IGM u PK F BiH



Okrugli sto u Komori...

Definisane mjere energetske efikasnosti za 973 zgrade u TK



U Kantonalnoj privrednoj komori u Tuzli održan je okrugli sto sa ciljem iznalaženja najpovoljnijeg načina finansiranja implementacije mjera energetske efikasnosti u stambenim zgradama na prostoru ovog kantona. Predstavnici kompanije Enova prezentirali su rezultate izvršenih mjerenja svih stambenih zgrada u Tuzlanskom kantonu na kojima je potrebno provesti mjere energetske efikasnosti. Ovaj skup organizovan je u okviru REELIH projekta koji ima za cilj povećanje energetske efikasnosti u domaćinstvima sa niskim primanjima. Projekat se realizuje uz finansijsku pomoć USAID-a, a implementator je Habitat International u saradnji sa Metropolitan Research Institutom iz Budimpešte i kompanijom Enova iz Sarajeva. Okruglom stolu su prisustvovali premijer

Tuzlanskog kantona Bego Gutić, te ministar prostornog uređenja i zaštite okolice Hasan Fehratović, uz učešće načelnika općina, te predstavnika kompanija proizvođača i distributera toplotne energije. Na osnovu izvršenih mjerenja, kompanija Enova sačinila je bazu podataka i napravila 3D model za 973 zgrade, te izvršila procjenu trenutnih potreba za energijom za zagrijavanje i potencijalnih ušteda koje je moguće ostvariti provođenjem mjera energetske efikasnosti. Prema prezentovanim preliminarnim podacima, provođenjem mjera energetske efikasnosti u izolaciju zidova, tavana i podova, te zamjenom prozora, ostvarile bi se uštede u potrebnoj energiji za zagrijavanje do 53% uz smanjenje emisija CO₂ od 24.945 tona godišnje. Predstavnici Metropolitan Research Instituta iz Budimpešte prezentovali su iskustva u implementaciji mjera energetske efikasnosti u regionu, te ukazali na potencijalne modele njihovog finansiranja. Ministar Fehratović izrazio je zadovoljstvo prezentiranim dosadašnjim rezultatima projekta i ukazao na značaj mogućih ušteda i okolišnih efekata provođenja mjera energetske efikasnosti u Kantonu, te izrazio interes ministarstva za dalju podršku implementaciji REELIH projekata. U narednim fazama ovog projekta pristupiće se formulisanju finansijskog modela, te izradi energetskog akcionog plana za oblast zgradarstva u Tuzlanskom kantonu, kao i testiranju modela na odabranim pilot zgradama.

Iz Udruženja za komunalne djelatnosti...

Incijativa za izmjenu i dopunu Zakona o komunalnoj djelatnosti na području TK



Udruženje za komunalnu privredu Kantonalne privredne komore Tuzla održalo je sjednicu Odbora Udruženja u proširenom sastavu. Raspravljalo se o Incijativi za izmjenu i dopunu Zakona o komunalnoj djelatnosti na području Tuzlanskog kantona. Sastanak je upriličen kako bi se aktualizirala problematika vezana za regulatorno tijelo, organizovanje, obezbjeđenja između osnivača i davalaca usluga. Treći je ovo sastanak u ovoj godini na istu temu a prema riječima Fuada Alića predsjednika Odbora Udruženja, veoma je teško riješiti svu problematiku iz komunalne oblasti. **“Mi pripadamo lokalnoj zajednici koja određuje mjere, pravila i sve ostalo vezano za**

ovu oblast. Istovremeno, vezani smo za kantonalne zakone i u toj isprepletenosti nadležnosti upravo leži najveća smetnja rješenju problema. Mi predlažemo Vladi TK da se formira tijelo koje će regulisati probleme iz komunalne djelatnosti i da putem institucija sistema napravimo kvalitetan ugovor o međusobnim pravima i obavezama komunalnih preduzeća u lokalnim zajednicama” izjavio je predsjednik Alić. Kako je istakao Senad Memić direktor JKP “Komus” Gračanica, usaglašena je i Vladi TK predložena inicijativa za izmjenu i dopunu Zakona o komunalnoj djelatnosti na području TK. **“Smatramo da je vrijeme za određene izmjene u Zakonu koji je na snazi više od deset godina. Izmjene se odnose na foriranje Regulatorne agencije za cijene komunalnih usluga. Cijene su do sada formirala općinska vijeća a to prilično komplikuje rad komunalnih preduzeća. Traži se primjena modela koji su na snazi u nekim drugim kantonima, traže se izmjene i dopune vezane za finansiranje izgradnje i održavanja komunalne infrastrukture”**, izjavio je direktor Memić. Istakao je kako se očekuje da Vlada TK prihvati ovu inicijativu, da se u najkraćem roku upriliči sastanak na ovu temu.

D.K.



Iz Udruženja za trgovinu, ugostiteljstvo i turizam...

Razmatrana aktuelna problematika

- Odboru potreban pomoć predsjednika Komore – Uputiti zahtjev Vladi FBiH da se prespita Uredba o uslovima i načinu plaćanja gotovim novcem – Neophodna kvalitetnija saradnja sa P/GKFBiH – Razmotriti ideju organizovanja sajamske manifestacije -

Članovi Odbora Udruženja za trgovinu, ugostiteljstvo i turizam Kantonalne privredne komore Tuzla na redovnom su sastanku razmatrali aktuelnu problematiku u oblasti trgovine, ugostiteljstva i turizma na području Tuzlanskog kantona.



Nakon rasprave i prijedloga po navedenoj problematici doneseni su sljedeći zaključci:

1. Odbor Udruženja od predsjednika Kantonalne privredne komore Tuzla zahtijeva da razmotri mogućnost uključenja u realizaciju zaključaka Odbora kako bi dao doprinos bržem i kvalitetnijem rješenju problematike u oblastima trgovine, ugostiteljstva i turizma.

2. Odbor Udruženja će u ime Udruženja, odnosno Kantonalne privredne komore Tuzla uputiti dopis Vladi Federacije Bosne i Hercegovine, odnosno Federalnom ministarstvu finansija u kojem se traži da se prespita Uredba o uslovima i načinu plaćanja gotovim novcem. Akcenat treba staviti na član 3. (Namjene gotovinskih plaćanja) i član 8. (Evidentiranje gotovog novca). U članu 3. stav b) isplata akontacija putnih troškova i dnevnica za službena putovanja u zemlji i inostranstvu treba preispitati jer je nemoguće izvršiti pravdanje slijedeći dan. Takođe, u članu 3. treba dodati stav koji će se odnositi na isplatu neto plaća, jer mnoge firme imaju blokirane račune, a po zakonu se plaća mora isplatiti. Član 8. treba da se ispravi, jer mnoga privredna društva koja imaju maloprodaju u poslovnim jedinicama (trafike) imaju veći trošak odnošenja gotovog novca u banku nego što imaju zarađenog gotovog novca za taj dan. Da se u dopisu navede da privredni subjekti koji imaju dobro poslovanje budu partneri vlasti kako bi mogli učestvovati u kreiranju i donošenju ovakvih i sličnih uredbi, odluka, zakona itd. Ovi zaključci će biti dostavljeni svim komorama Federacije BiH, kako bi zajednički nastupili prema Privrednoj komori Federacije BiH, a onda prema Vladi Federacije a kako bi se ova Uredba izmjenila, te predsjedniku Kantonalne privredne komore Tuzla kako bi razmotrio mogućnost njegovog uticaja u P/GKFBiH i resornom ministarstvu.

3. Na osnovu iskustava iz prethodnog perioda i činjenice da se u P/GKFBiH obavlja više značajnih aktivnosti koje mogu doprinijeti radu Odbora, stav članova Odbora je da se u narednom periodu treba pokrenuti inicijativa za kvalitetnije povezivanje sa P/GKFBiH. Stav članova Odbora je da je potrebno u narednom periodu pratiti aktivnosti Federalnog Udruženja koje obuhvata oblasti trgovine,

ugostiteljstva i turizma, pozivati njihove predstavnike u Tuzlu na zajedničke sastanke, razmotriti mogućnost prisustva sastancima resornog Udruženja na nivou P/GKFBiH. Pokušati zajednički djelovati na rješavanju zajedničkih problema i na pokretanju inicijativa koje mogu biti od koristi i jednim i drugim. Pokušati se uključiti i u projekte koje organizuju u PGKFBiH, tražiti aktivnije učešće naših predstavnika, kvalitetniji pristup informacijama koje oni provode, pokušati obezbijediti naše učešće u svim sajamskim manifestacijama koje se posjećuju u organizaciji PGKFBiH i otvoriti brojna druga pitanja od zajedničkog interesa za privredne subjekte u Tuzlanskom i Sarajevskom kantonu te cijeloj Federaciji. Za realizaciju ove inicijative neophodna je pomoć u aktivno uključjenje predsjedniku Kantonalne privredne komore Tuzla i njegovih saradnika.

4. Članovi Odbora Udruženja za trgovinu, ugostiteljstvo i turizam Kantonalne privredne komore Tuzla, stava su da je potrebno pristupiti realizaciji ideje sa prethodnih sastanaka a vezano za organizovanje sajamske manifestacije. Naime, smatra se da Komora ima i može stvoriti sve pretpostavke da bude organizator jedne kvalitetne sajamske manifestacije u Tuzli kao privrednom centru šire regije. Smatra se da je potrebno Tuzli vratiti sajamsku ulogu a da je Komora najpozovanija institucija da bude organizator sajma koji bi mogao okupiti veliki broj privrednika uključenih u privredne komore šireg regiona. Imajući u vidu da je Privreda TK kao sajamska postavka koju već tradicionalno organizuje Komora Tuzla, prisutna na brojnim sajamskim manifestacijama, za očekivati je i pozitivne povratne reakcije organizatora sajmovi na kojima se do sada nastupalo. Također, za očekivati je da će se i kvalitetna međukomorska saradnja pokazati na djelu te da neće ostati novi sajam bez podrške brojnih komora iz okruženja. Brojne turističke organizacije iz šire regije imaju šta ponuditi a činjenica je da se, bez obzira na to što se turizam ističe kao značajna privredna grana, u posljednje vrijeme malo pažnje poklanja organizovanim prezentacijama i sajamskim promocijama turističkih potencijala. Smatra se da Komora raspolaže kadrovima u menadžmentu koji mogu dobiti svesrdnu podršku Vlade Tuzlanskog kantona i načelnika u kantonalnim općinama, kako bi se što uspješnije realizovala ideja sajma u Tuzli. Stav je da organizovanje sajma može biti izvanredan način da se popune hotelski kapaciteti na području TK, da se ostvari povećanje profita u oblasti trgovine i ugostiteljstva. Komora bi jednim ovakvim potezom u pravoj mjeri bila servis svojim članicama, privrednim subjektima koji bi redovnije plaćali članarinu a vjeruje se da bi porastao i broj članica Komore. Sve to je indirektna i dugoročna zarada Komore na sajmu koji u prvih nekoliko godina, očekivano, ne može donijeti finansijsku korist.

5. U vezi svega navedenog, članovi Odbora Udruženja smatraju da je nepohodno u što kraćem roku upriličiti sastanak sa Kantonalne privredne komore Tuzli njegovim saradnicima, kako bi se razgovaralo o svim inicijativama i zaključcima, a za sastanak je već oformljena radna grupa.

D.K.



Uspješna sradnja Omega i Beka...

Džambić: “Omega je brend i tako će i ostati!”

Omega i Beko 15 godina zajedno! - Još 250 novih radnika

Druženjem sa novinarima, svečano je obilježeno 15 godina prisustva proizvoda kućanskih aparata brenda Beko, koje se na tržištu Bosne i Hercegovine plasira u saradnji sa kompanijom Omega. Predstavnici dvije respektabilne kompanije naveli su da su tokom ove godine otvorili šest novih Beko prodajnih jedinica u pet gradova. U povodu obilježavanja 15 uspješnih godina razvoja Beko brenda u Bosni i Hercegovini, zajedno sa Omegom, Edim Džambić generalni direktor “Omega”, zahvalio se medijima na podršci i saradnji i govorio o kompaniji “Omega”. **“Kompanija “Omega” je firma nastala osamdesetih godina u Bosni i Hercegovini, kao jedna od prvih kompanija u privatnom vlasništvu. U svom razvoju imala je uspona i padova. Trenutno je “Omega” respektabilna kompanija koja radi u nekoliko sektora. Cod biznis je prodaja tehnika a zastupljeni su i prehrambeni sektor, distribucija prehrambenih artikala u tri distributivna centra u BiH a to su Banjaluka, Tuzla i Sarajevo, i nekretninski posao. Zapošljava 450 radnika i svaki dan se planira povećanje broja zaposlenih. Najnovija investicija na objektu u Tuzli rezultirala je zapošljavanje 50 novih radnika. Naše razvojne strategije su takve da ćemo u naredne dvije godine imati još 250 novih zaposlenika. “Omega” je, kao i Beko u cijelom svijetu, za bosanskohercegovačke pojmove, brend i tako će i ostati”,** bile su riječi Edima Džambića generalnog direktora “Omega”.



Azmir Ibršimović, voditelj prodaje Odjela bijele tehnike u Omegi istakao je da su se u proteklih 15 godina sa distributerima širom BiH izgradile neraskidive veze. **“Naši rezultati svakako su brojevi prodatih aparata, ali i povjerenje, pouzdanost i povezanost sa našim potrošačima. Ove vrijednosti važnije su nam od pukih nabiranja brojeva. Kompanija Omega i brend Beko pokušavaju biti što bliži našim sugrađanima. Osim dva otvorena šopa u Sarajevu, te u Banjoj Luci, Gradišci, Brčkom i Goraždu, iduće godine planiramo otvaranje u još tri grada”,** izjavio je Ibršimović. Istakao je na druženju s novinarima da Omega danas u svom vlasništvu ima 25 Beko prodavnica.



Ibršimović je dodao i to da su u ovoj godini u prodaji Beko proizvoda zaposlili 40 novih radnika. **“Pokrenuli smo prodaju putem interneta, Omega trenutno pripada grupi deset najvećih trgovačkih kuća u BiH. Jedna od prednosti kod kupovine Beko uređaja jeste jaka servisna mreža, sa preko 50 ovlaštenih servisa u BiH. Besplatna dostava, unošenje u stan, kupovina sa popustima, beskamatni krediti, kupovina na rate samo su neki od razloga zašto posjetiti Beko shop”,** rekao je Ibršimović. Osim Beko proizvoda u Beko shopu se mogu naći i GRUNDIG proizvodi koji su svakako svima već dobro poznati, a polako se ovaj brand ponovo vraća i u našu zemlju sa sve većom ponudom televizora i elektronike. Arel Atakol, direktor Beko za Balkan, rekao je da on predstavlja globalni brend, koji se prodaje u 130 država, te da se njihovi proizvodi koriste u milionima domaćinstava širom svijeta. **“Naš je cilj postati brend broj jedan na svim tržištima narednih godina. BiH nam je trenutno važna država i ostat će važno tržište. Ponosni smo što smo zadržali prvo prodajno mjesto na ovom tržištu. Odlučni smo uzvratiti zajednici. Beko godinama podržava sport, a naročito ulične košarkaške turnire. Prepoznali smo potrebu pomaganja i tokom prošlogodišnjih poplava u BiH, a nastaviti ćemo doprinositi i u tom duhu želimo nastaviti ulaganje”,** izjavio je Atakol. Beko, koji saraduje sa grupacijom Arcelik, u ponudi ima preko 1.000 različitih proizvoda, a svake dvije godine lansira novitete. U BiH se najviše prodaju njihovi frižideri, zamrzivači, mašine za veš, samostojeći štednjaci i drugi proizvodi.

Pripremio:
Dino Kalesić



Iz Udruženja za trgovinu, ugostiteljstvo i turizam...

Novi brend „Ajna voda“ u objektima “Piemonte”

Zdrava voda je izvor zdravog života



U Udruženju za trgovinu, ugostiteljstvo i turizam Kantonalne privredne komore Tuzla, održana je sjednica Odbora Udruženja u proširenom sazivu, posljednja u ovoj godini. Razgovaralo se o kvalitetu vode za piće, kada su u pitanju flaširane vode dostupne kupcima u trgovinama na području Tuzlanskog kantona. Sa stručnog aspekta o ovoj temi je govorio Vedret Hukić dipl. ing. tehnologije iz firme “Water - Chem” doo Tuzla, inače, stručni saradnik za poslove terenske dijagnostike, tretmana i inženjeringa vodnih objekata. Istakao je u uvodnom izlaganju kako je zdrava voda izvor zdravog života i opstanka čovjeka na zemlji. Od ranije nam je poznato da voda čini oko 60% sastava organizma odraslog čovjeka, a kod novorođenih beba taj procenat iznosi i 90% vode.

Zavisno od klimatskih uvjeta optimalne potrebe našeg organizma za vodom su 3- 5 lit/dnevno. Sa neželjenim gubicima u organizmu čovjeka se javljaju tegobe kao: glavobolja, manjak koncentracije pamćenja, poremećaj u radu bubrega, probavnog metabolizma i srca. Smanjenjem unosa vode u organizmu dolazi do smanjenja volumena krvi koja hrani srce, mozak, mišiće a prestanak unosa vode dovodi mnogo brže do smrti, nego neunošenje hrane. Na zemaljskoj kugli 1,5 milijardi ljudi uopšte nema čiste vode za piće. Kao saradnik na projektu novog brenda “Ajna” izvorska voda, govorio je i o njenim kvalitetima. “U podnožju živopisnih ekoloških padina na domak stare planine Majevice, geografskog reiona Rasovac grada Tuzle je odsjeka aktuelan arteški prirodni izvor, zdrave izvorske vode, novog brenda imena „Ajna“. Izvorska voda „Ajna“ po svom ispitivanom bio-hemijskom sastavu katjona i anjona svrstana je u balneo-hemijsku klasifikaciju i tip vode po eu - normi kao: Natrijum-magnezijum-kalcijum hidrokarbonatna voda. Ovlaštena laboratorija Federalnog zavoda za javno zdravstvo je izdala certifikat kvalitete bio-hemijskog sastava “Ajna”vode, kao zdrave i ispravne te se kao takva može poželjeti u svakodnevnoj konzumaciji za sve uzraste. Deklaracija etiketirana na proizvodnom programu „Ajna“ vode asortimani 5l i 0,5l daje osnovne informacije potrošačima, koje su usklađene po zvaničnom zakonu za flaširanje pitke vode u BiH. Važno je pomenuti da se radi o isključivo prirodnoj izvorskoj vodi u čijem sadržaju su dokazani otopljeni minerali veoma korisni za stabilan organizam čovjeka. Ujedno, optimalna je koncentracija kalcija i magnezija pretežno u vidu hidrokarbonata i karbonata što je sa medicinske tačke veoma značajnu jer su izuzetno potrebni za koštano-mišićni sustav ljudskog organizma. Posebna pogodnost u vidu zdravstvene bio-hemijske ravnoteže se ogleda u efektu zdrave funkcije miokarda i krvotoka uopšte. Ispitivanja

su pokazala da teških metala poput mangana praktično i nema što posebno daje lijep okus i pitkost „Ajna“ vode a optimalan sadržaj prirodnog fluorida je pogodan za zaštitni faktor koštanog sustava zubi i dentalne higijene. Relativno nizak sadržaj anjona sulfata dodatno čini ovu vodu poželjnom u svakodnevnoj konzumaciji, sa stanovišta normalnog rada bubrega i mokraćnih kanala. Treba istaći da ph - vrijednost „Ajna“vode u vrijednosti 8,30 kvalitetno pogoduje zdravom metabolizmu i želudačnoj funkciji. Posebno je kao prirodna takva ph-voda u konzumaciji kategorizirana i kao prirodan fungicid za održavanje zdrave biološke ravnoteže organa za varenje. Konzumiranje „Ajna“ vode je poželjno svakodnevno za sve uzraste u neograničenoj količini. Tim prije, što za opštu vitalnost je potrebno omogućiti konstantan protok hranljivih materija za organizam, a to je najefikasnije regulisano sa vodom u cilju protočnosti krvotoka i kiseonika u ljudskom organizmu”, istakao je inženjer Hukić.

Proizvodnju i punjenje “Ajna” vode potpisuje firme “City” centar Tuzla BCC Izvorište Tušanj. “Veoma je važno istaći da je ovdje riječ o vodi proizvedenoj po EU standardima, pod nadzorom vrhunskih stručnjaka u postrojenjima od inoxa bez prisustva plastičnih materijala u procesu proizvodnje. Završni su svi radovi, obavljene sve aktivnosti vezane za probnu proizvodnju, punjenja i pakovanjima i raduje nas da možemo izjaviti da je naša voda već na policama u trgovinskim objektima”, izjavila je Samra Mujić Alibegović direktorica firme “City centar” doo Tuzla koja je odmah po izlasku vode na tržište, postala članica Kantonalne privredne komore Tuzla. “Iskrene čestitke firmi “City centar” Tuzla na hrabrosti i odluci da se krene u novi posao. Želim da firma vječno radi, posluje pozitivno a na nama iz “Golden tours” je da damo svoj skromni doprinos razvoju i podržimo distribuciju i potrošnju nove vode, da podržimo korištenje domaćih proizvoda. Raduje me da u Tuzli imamo ovako kvalitetnu vodu koja već na prvu konzumaciju potvrđuje sve nalaze analiza i što je o njoj rečeno. Ujedno, žao mi je što ovdje nisu prestavnici vlasti, što nema predstavnika resornih ministarstava, Grada, institucija koje zagovaraju kupovinu i korištenje domaćih proizvoda. Ovakvom jednom projektu je sada, u početnoj fazi, neophodna pomoć”, izjavio je Asim Bečić direktor i vlasnik TA “Golden tours” Tuzla, član Odbora komorskog Udruženja.

“Moje iskrene čestitke firmi “City centar” Tuzla, prije svega zbog odluke da se odmah učlani u Komoru i dobrodošli su u naše Udruženje. Raduje me da imamo priliku od danas konzumirati ovako kvalitetnu vodu, domaći proizvod domaće firme i zaslužuju sve pohvale a ujedno i podršku S tim u vezi, želim istaći da će kao znak podrške, vrlo brzo “Ajna” voda biti na policama svih trgovina u lancu “Piemonte” Tuzla”, izjavio je Kasim Selimović predsjednik Odbora Udruženja za trgovinu, ugostiteljstvo i turizam Kantonalne privredne komore Tuzla te direktor i vlasnik firme “Piemonte” Tuzla”. Predstavnici firme “City centar” Tuzla po uclanjenju u Komoru će biti aktivni članovi Odbora komorskog Udruženja a u narednom periodu i redovni učesnik zajedničke sajamske postavke “Privreda TK”, koju Kantonalna privredna komora Tuzla organizuje za svoje članice na sajmovima u zemlji i inostranstvu.

Pripremio:
Dino Kalesić



Iz Udruženja za promet i komunikacije...

Formirana grupa za zaključke

Redovne aktivnosti Udruženja - Javna rasprava o javnom prijevozu putnika u Tuzli - Pokušava se smanjiti prolazak vozila kroz Grad - Refleksije Odluke na žitelje općine Tuzlanskog kantona -

U okviru redovnih aktivnosti predviđenih Programom rada Udruženja za promet i komunikacije Kantonalne privredne komore Tuzla, upriličena je sjednica Odbora Sekcije za unutrašnji promet putnika u proširenom sastavu.

Tema skupa bila je Javna rasprava o odluci o utvrđivanju načina organizovanja javnog prijevoza putnika na području grada Tuzle, te usklađivanje redova vožnje na nivou grada Tuzle.



Kako je kazao Nenad Lukanović, savjetnik ministra za saobraćaj u Ministarstvu, turizma, trgovine i saobraćaja u TK, ni građani ni prijevoznici ne bi smjeli biti oštećeni jednom ovakvom odlukom Gradskog vijeća. Podsjetimo, obavljanje javnog prijevoza putnika na području Tuzle, kako je navedeno u odluci, vršilo bi se na način da bi prevoznici koji saobraćaju na kantonalnim linijama, a koji dolaze iz općina Kladanj, Živinice, Banovići, Lukavac, Gradačac, Gračanica, Srebrenik, Doboj-Istok, koristili kao polaznu i dolaznu Gradsku stanicu Zapad na bližoj lokaciji preko puta ulaza u fabriku Siporex. Dok bi prevoznici koji saobraćaju na kantonalnim linijama, a koji dolaze iz općina Kalesija, Sapna, Teočak, Čelić, koristili bi Gradsku stanicu Istok. Oformljena je na ovom skupu Grupa od 3 člana iz Sekcije, koji će formulisati zaključke i prijedloge sa javne rasprave a koje će uputiti Službi za komunalne poslove, izgradnju i poslove mjesnih zajednica Grada Tuzla te Gradskom Vijeću Tuzla.

Prema riječima Bajre Halilčevića, predsjednika Odbora Sekcije za unutrašnji promet putnika, grad Tuzla pokušava već pet godina da napravi prijevoz kojim bi se umanjilo prolazak vozila kroz grad, te time smanjilo zagušenje u saobraćaju. Govorilo se na skupu o refleksijama takve odluke na žitelje ostalih općina Tuzlanskog kantona koji svakodnevno putuju za Tuzlu, iznošeni stavovi i mišljenja, raspravljalo se o odluci kojom bi se uredio javni prijevoz putnika. „Ako bi se ova odluka donijela šteta bi bila ogromna u odnosu na mještane drugih općina. Jednostavno, ako uzmete da bi ljudi morali presjedati po dva tri puta da bi došli u Tuzlu, odnosno na fakultete ili UKC, to bi bila određena degradacija putnika – poručio je Halilčević. Neće biti rješenja ako se obustave ostali prevoznici kroz Tuzlu jer autobusi prometuju „južnom magistralom“ što je riješeno 2008. godine kada je ukinuta autobuska stanica Pinga“, rekao je Halilčević.



D.K.



Iz Kantonalne privredne komore Tuzla...

Povećan broj članica Komore

4 privrednih subjekata novi članovi Komore u decembru

Kada je u pitanju članstvo u Kantonalnoj privrednoj komori Tuzla, zadovoljstvo je istaći kako se nastavlja trend povećanja broja članica, iz mjeseca u mjesec. U posljednjih dva mjeseca velikom broju privrednih subjekata koje su potpisale članstvo u Komoru, pridružilo se još četiri. Riječ je o slijedećim firmama koje su se odmah po učlanjenju u Komoru, aktivno uključile u rad granskih udruženja te izjavile spremnost za sudjelovanje na sajamskim manifestacijama u okviru zajedničke sajamske postavke pod nazivom "Privreda TK" koje će u narednom periodu za svoje članice organizovati. To su "City Centar" doo Tuzla, "Mhi kompani" doo Lukavac, "Hmh Promet" doo Živinice, OD "Termoplast" Gračanica.



KANTONALNA
PRIVREDNA
KOMORA TUZLA

Izdavanje ATA karneta...

Obračunski period juni-oktobar 2014. godine

Ukupno 205 zahtjeva u pet mjeseci



U 2014. godini je nastavljeno izdavanje ATA karneta u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla. Podizanje dokumenata vrši se na mjestu gdje je zahtjev i podnesen. **"Kada su u pitanju izdati ATA karneti i dodatni listovi u ovoj godini, dakle, u periodu od 1. januara do 31. decembra, pristiglo je ukupno 386 zahtjeva. Od toga je bilo 187 zahtjeva za izdavanje ATA karneta i 199 zahtjeva za izdavanje dodatnih listova za ATA karnet. Od 187 zahtjeva za izdavanje ATA karneta, 104 zahtjeva su podnijela fizička lica iz sljedećih opština: Bijeljina, Lukavac, Srebrenik, Tuzla, Gračanica, Brčko, Zvornik, Gradačac, Bratunac, Banovići, Jelah, Živinice, Doboj, Zavidovići, Tešanj, Kalesija, Orašje, Doboj jug, Teslić i Ugljevik a 83 zahtjeva su podnijele firme iz Bijeljine, Lukavca, Gračanice, Tuzle, Gradačca, Tešnja, Živinica, Srebrenika, Kalesije, Miričine, Bihaća, Odžaka, Usore, Banovića i Brčkog. Ukupno 159 fizičkih lica podnijeli su zahtjev za izdavanje dodatnih listova, a 40 zahtjeva stiglo je iz privrednih društava,"** izjavila je Suada Rekić stručni saradnik u Uredu za pružanje informacija o ATA sistemu i izdavanje ATA karneta Vanjskotrgovinske komore u Tuzli. Sve dodatne informacije, kao i potrebne upute o ATA sistemu i obrasce, zainteresirani mogu pronaći na web stranici Vanjskotrgovinske komore BiH www.komorabih.ba ili direktno – na osnovu dole navedenih kontakt informacija kao i u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla - Trg slobode bb – 75000 Tuzla - Tel/fax. +387/35/396-556 i Fax:+387/35/369-552, Email: atatz@komorabih.ba - kontakt osoba: Suada Rekić.

KANDIDOVANJE PROGRAMA UTROŠKA SREDSTAVA TRAJNOG REVOLVING FONDA

Na osnovu Zakona o federalnim ministarstvima i drugim tijelima federalne uprave, određaba Odluke o usvajanju Programa utroška sredstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2015. godinu, Federalno ministarstvo energije, rudarstva i industrije o b j a v l j u j e JAVNI POZIV za kandidovanje programa utroška sredstava trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2015. godinu. Kompletan tekst javnog poziva i Programa na www.kpktz.ba.

D.K.



Novi proizvod na tržištu...

Portanaturae: ulje od konoplje na BH i EU tržištu

Jedna su od rijetkih firmi, čiji su proizvodi, svi do jednog, registrovani u Zavodu za javno zdravstvo FBiH



PortaNaturae je osnovana 2010. godine u Srebreniku. Ideja o osnivanju ove firme je nastala iz dugogodišnjeg angažmana njenih osnivača na polju izučavanja ljekovitih dejstava prirodnih produkata, prije svega čurekotovog ulja. Prvi proizvod iz ove firme bio je „Nigellus“ – visoko-kvalitetno, hladno cijedeno čurekotovo ulje. Firma je ubrzo po formiranju postala i članicom Kantonalne privredne komore Tuzla, aktivnim sudionikom svih aktivnosti u Odboru Udruženja za trgovinu, ugostiteljstvo i turizam. Posebno mjesto ima i kao redovni učesnik zajedničke sajamske postavke pod nazivom “Privreda TK” koju Komora tradicionalno organizuje na sajmovima u zemlji i inostranstvu, na obostrano zadovoljstvo i uz nadu da će se saradnja nastaviti i u narednom periodu. Već smo predstavili ovu firmu ističući entuzijazam mladih ljudi, vrhunski profesionalizam, jasnu viziju da se ideja provrede u djelo, da se postigne uspjeh. Da bi se pokrenula, u to vrijeme jedinstvena na ovim prostorima, proizvodnja ulja od čorokota, bila je uz unikatnu ideju, potrebna i savremena tehnologija koju je u narednim fazama pratio moderan dizajn i veoma zanimljiv proizvod za naše tržište, ljekovit, koristan u svakodnevnoj upotrebi. Nije trebalo dugo, a asortiman je proširen. Ubrzo je počela proizvodnja ulja od bundevinog sjemena, ulja od lana i drugih proizvoda. Početne norme za godišnju proizvodnju vrlo brzo su pomaknute, uvećane, zadovoljstvo klijenata je raslo, rasle su narudžbe. Danas asortiman ima, uz čorokotovo, registrovano bućino ulje koje čeka da bude pozicionirano na našem tržištu, da se steknu uslovi da prije svega cijenom konkuriše uvoznim uljima. Tu je ulje od lana a najnoviji proizvod, već plasiran na bh i EU tržište je ulje od industrijske konoplje. **“Ono što je poznato kada je u pitanju ova djelatnost, jeste da finansijska ulaganja u proizvodnju nisu velika. Mi već imamo zadovoljavajuću opremu i dozvole za proizvodnju ulja na bazi raznih sjemenki, a ti novi proizvodi ne iziskuju novu radnu snagu, bar ne za sada. Planiramo otvoriti i jednu manju maloprodajnu radnju u kojoj bi bili zastupljeni proizvodi zdrave hrane. Inače, naše proizvode moguće je nabaviti u skoro svim apotekama u BiH, jednostavno je naručiti ih i na kućnu adresu putem maila: narudzba@portanaturae.com ili telefona sa brojem 062/716-502, a u saradnji sa Kantonalnom privrednom komorom Tuzla, stalni smo učesnici zajedničkih sajamskih postavki u zemlji i inostranstvu pa samo i na taj način dostupni kupcima”,** izjavio je Mustafa Šabić direktor firme. Kako je istakao Adnan Kavgić dipl.ing. prehrambene tehnologije, ulje se dobiva procesom “hladnog presovanja”. **“Ulje se ne procesuiru dalje nakon presovanja, tako da u bocama**

dolazi sa talogom od sjemena. od sjemena čorokota pakuje se u bocama od 250 ml, 125ml i 50 ml. Sirovina za proizvodnju se nabavlja od renomiranog dobavljača iz zemlje i inostranstva, a samo sjeme je porijeklom iz Sirije i kontrolisano je više puta od strane dobavljača i u firmi PortaNaturae. Boce koje se koriste za pakovanje ulja su porijeklom iz Hrvatske i one su, također, ispitane, čepovi za boce su porijeklom iz Italije, a kutije su iz Bosne i Hercegovine”, rekao je Kavgić. Dodao je da će bućino ulje sigurno biti na tržištu u narednoj godini. A nije zanemarljiv podatak da su proizvodi “PortaNaturae” prisutni na tržištu cijele Bosne i Hercegovine u veledrogerijama, apotekama, tržnim centrima, prodavnicama zdrave hrane, a izvoze se u određene zemlje Evropske unije. Trenutno je problem sa cijenom sirovine zbog aktuelne političke situacije u Siriji i Egiptu, odakle se doprema sirovina. Česte su promjene cijena u nabavci ali i tom problem uspijevaju odolijevati. Zadovoljnih kupaca je sve više, priznanja i pohvala sa svih strana, čak i od stručnih osoba iz visokoškolskih ustanova, inače redovnih korisnika ulja iz “PortaNaturae”. Jedna su od rijetkih firmi, čiji su proizvodi, svi do jednog, registrovani u Zavodu za javno zdravstvo FBiH.

VTK BIH ORGANIZIRALA SEMINARE O POSLOVANJU SA NJEMAČKOM U PREHRAMBENOJ I GRAĐEVINSKOJ INDUSTRIJI



Vanjskotrgovinska komora Bosne i Hercegovine u sklopu DIHK-CEFTA projekta organizirala je seminare “Kako poslovati sa Njemačkom sa posebnim osvrtom na prehrambenu industriju” i “Kako poslovati sa Njemačkom sa posebnim osvrtom na građevinsku industriju”. Semirani su organizirani s ciljem upoznavanja predstavnika preduzeća iz prehrambene i građevinske industrije sa neophodnim strateškim pripremama za međunarodno poslovanje, načinima izbora kanala distribucije, te marketinškim mjerama koje svako preduzeće treba poduzeti ukoliko želi uspješno poslovati na tržištu Njemačke. Predavač na seminarima, održanim 30. novembra i 01. decembra 2015. godine, bio je g. Hatto Brener iz AWI Međunarodnog poslovnog servisa iz Njemačke.

D.K.



Sajamske aktivnosti...

“Privreda TK” na sajmu u Brčkom

Još jedan uspješan Međunarodni sajam privrede “Brčko”



Međunarodni sajam privrede “Brčko 2015”, četrnaesti po redu, okupio je više od 270 izlagača iz BiH i inostranstva. Izlagači su svoje proizvode i usluge predstavili u halama Luke Brčko na 3.000 m² u periodu od 12. do 15. novembra 2015.god. Na svečanom otvaranju ove značajne privredne manifestacije, priređen je bogat kulturno umjetnički program u kojem su izvedene tradicionalne igre iz Indonezije. Ceremoniji su prisustvovali brojni gosti, predstavnici izvršne i zakonodavne vlasti, uspješni brčanski privrednici, brojni učesnici sajma. Svi su ponudili jedinstvenu priču o značaju privrede i privrednih manifestacija za razvoj Brčko Distrikta i Bosne i Hercegovine. **“Ovo je još jedan pokazatelj da privrednici Brčko distrikta imaju šta pokazati svojim prijateljima iz zemlje i okruženja, no isto tako pokazuje da je Distrikt atraktivna destinacija za mnoge izlagače koji su došli iz susjednih država. Vrlo je zanimljivo da nam je ove godine partner na sajmu država Indonezija koja se uključila u organiziranje sajma. Ovo je sajam gospodarstva ali tu su i drugi prateći sadržaji koji govore o našoj multinacionalnosti, multikulturalnosti, odnosno raznolikosti koja se nadopunjuje sa privrednim ponudama”,** kazao je Anto Domić, gradonačelnik Brčko distrikta BiH.

Na svečanosti otvaranja Sajma predsjednik Bojiću je uručeno Priznanje za višegodišnju podršku i pomoć na unaprijeđenje privrede i međukomorske suradnje i pomoći u radu Privredne/Gospodarske komore Brčko distrikta BiH i Zahvalnica Vanjskotrgovinskoj komori Bosne i Hercegovine na višegodišnjoj podršci i pomoći u radu Privredne/Gospodarske komore Brčko distrikta BiH i unapređenju međukomorske suradnje. Na sajmu, koji se održava pod motom „Kupujmo domaće“, predstavljeni su privrednici iz BiH, Hrvatske, Srbije, Crne Gore, Slovenije, Austrije, Njemačke, Turske i Indonezije. Pokrovitelj ovogodišnjeg sajma bila je Vlada Brčko distrikta BiH, Vanjskotrgovinska / Spoljnotrgovinska komora BiH, te Ministarstvo vanjske/spoljne trgovine i ekonomskih odnosa BiH. Sajam su sponzorski podržali kompanija “Antunović” i JP „Luka Brčko“. Zemlja partner sajma bila je Republika Indonezija. Ove godine prvi put je organiziran prostor sa izlagačima pod motom „KUPUJMO DOMAĆE“.

“Vanjsko-trgovinska komora BiH već petu godinu za redom pomaže da se ovakve manifestacije što bolje prikažu javnosti i svijetu. Uzeli smo učešće kako bi prezentirali potencijale BiH kako domaćim privrednicima, te potencijalnim inozemnim kupcima koji su ove godine u velikom broju”, kazao je Bruno Bojić, predsjednik Vanjskotrgovinske komore BiH.



Ove godine su Privredu TK u Brčkom predstavljali slijedeći subjekti: “Borplastika Eko” doo Tuzla, “Corn Flips” Srebrenik, “Fana” doo Srebrenik, “Golden tours” Tuzla, “Imel” doo Lukavac, “Omega” dd Živinice, “Piemonte” doo Tuzla, “Pivara” dd Tuzla, “PRO PAK” doo Tuzla, “Solana” dd Tuzla, OPG “Veselčić” Špionica, Udruženje žena poljoprivrednih proizvođača “Agro Vražići”, “Portanaturae” doo Srebrenik, “Voćni rasadnik” doo Srebrenik, “Xella BH” Tuzla, “Čokoladni svijet” Tuzla i “Sparkasse” Banka, dvije nove članice Komore.

Pripremio:
Dino Kalesić



Sajmovi u 2016. godini...

Sajam "List" od 12. do 14. maja 2016. godine



Slijedeći potrebu za objedinjavanjem turističke ponude Bosne i Hercegovine, te za snažnijom i kvalitetnijom promocijom ove perspektivne privredne grane, u Lukavcu se 14. godinu za redom održava sajam turizma „LIST“. Manifestacija koja je već prevazišla lokalne i regionalne okvire će se slijedeće godine održati u terminu od 12.do 14. maja 2016. god. Prethodne godine na Sajmu turizma svoju ponudu predstavilo je 125. izlagača, a broj posjetilaca premašio je 15. hiljada. Doprinoseći ekonomskom razvoju BiH uz podršku organa vlasti, mi želimo dobrodošlicu svakom potencijalnom reprezentativnom gostu ili učesniku sajma iz Evrope i svijeta. Želja nam je da ponudimo i predstavimo najatraktivnije svjetske turističke resurse domaćim turistima a privrednicima iz BiH omogućimo lansiranje na svjetsko tržište. U isto vrijeme sajam je naša prilika da pokažemo Europi i širem okruženju, prirodnu ljepotu BiH i turističkih odredišta u našoj zemlji. Kvalitetu manifestacije će doprinijeti bogat, sadržajan i raznovrstan program. Prijavni materijal na www.kpktz.ba.

Sajmovi u 2016. godini...

„IHM“ Minhen - Njemačka u periodu od 24. do 28. 2. 2016. godine



Kantonalna privredna komora Tuzla u partnerstvu sa Obrtničkom komorom Tuzlanskog kantona u okviru svojih programskih i projektnih aktivnosti organizira za svoje članove posjetu Međunarodnom sajmu „IHM“ Minhen - Njemačka u periodu od 24. - 28. 2. 2016. godine. Sajam male privrede IHM u Minhenu je najveća svjetska manifestacija ovog tipa – najveći sajam preduzetništva u Evropi, mjesto prezentacije najnovijih tehnoloških dostignuća preduzetništva i prateće industrije, na

kojem ćete u 2016. godini imati priliku da vidite više od 1.000 izlagača i čitav spektar usluga i proizvoda najnovijih trendova. Cilj zajedničke posjete ovom najznačajnijem sajmu iz oblasti preduzetništva jeste upoznavanje sa novim znanjima i vještinama koji su u trendu današnjeg vremena i tehnologija. Cijena aranžmana za članove komore je 250,00 KM , a za one koje nisu članovi cijena iznosi 420,00 KM. Članovi komore koji se odluče na putovanje u ovom aranžmanu su dužni izvršiti uplatu kotizacije na žiro račun Obrtničke komore Tuzlanskog kantona broj 1321002009312910, NLB BANKA sa svrhom doznake „Učešće u zajedničkom projektu „. Broj mjesta je ograničen, te lista putnika će se formirati na osnovu pristiglih uplata do popunjavanja putničkih mjesta u autobusu . Aranžman obuhvata:• Prijevoz modernim turističkim autobusima• 2 noćenja s doručkom u hotelu 3* u centru Minhena u dvokrevetnim i trokrevetnim sobama (hotel Germania-www.hotel-germania.net)• Kompletnu organizaciju putovanja• Stručnog vodiča tokom svih planiranih posjeta po programu• Osiguranje aranžmana• Obilazak Minhena i Salzburga• Odlazak u pivnicu Augustiner Keller• Ulaznicu za IHM sajam• Prevodioca za njemački jezik za potrebe grupe• Međunarodno putničko-zdravstveno osiguranje. Aranžman ne obuhva individualne troškove.

D.K.



Iz Komorskog sistema BiH...

Okrugli Stol u Mostaru: Nužno uvesti obavezno članstvo i vratiti javne ovlasti GK F BiH



U Mostaru je u organizaciji Gospodarske komore Federacije BiH održan okrugli stol o javnim ovlastima u komorskom sustavu BiH s osvrtnom na komore u okruženju, na kojem su uz predstavnike Federalne gospodarske komore sudjelovali i predstavnici Gospodarske komore Republike Srpske, te predstavnici gospodarskih komora Hrvatske i Crne Gore, javlja Hrvatski Medijski Servis. Sudionici okruglog stola zaključili su kako, polazeći od zakonskih nadležnosti i ovlaštenja svojstvenih komorskom sustavu i naslijeđene pravne tradicije Komora, podržavaju trend vraćanja obveznog članstva Komorama, što je posebno evidentno u posljednje vrijeme u zemljama okruženja. Preuzimanjem javnih ovlaštenja na određeni način, Komora rasterećuje organe državne vlasti posebno u pitanjima koja se administrativno rješavaju i u slučajevima koje Komora može obavljati, čime se osigurava opstojnost komore, jedan je od zaključaka. Vršanjem javnih ovlaštenja-usluga, Komora postaje legitimni i legalni predstavnik gospodarstva, rečeno je na okruglom stolu u Mostaru. Sudionici su se suglasili kako treba podržati prijenos javnih ovlaštenja na gospodarske/ privredne komore, jer i sadržaj javnih ovlaštenja su svojstveni gospodarskim/ privrednim komorama. Obzirom da je Privredna/Gospodarska komora Federacije BiH, jedina Komora u zemljama okruženja koja nema obvezno članstvo, sudionici sastanka su suglasni da na bilo koji način posebno pred izvršno-zakonodavnim tijelima BiH, treba podržati uvođenje obveznog članstva. Predsjednik Gospodarske komore Federacije BiH dr Marko Šantić kazao je novinarima kako je obvezno članstvo u Gospodarskoj komori FBiH ukinuto još 2003. godine, te kako su dio ovlaštenja GKFBiH preuzeli Vanjskotrgovinska komora BiH, a dio neka od ministarstava. **“Na slabljenje Gospodarske komore FBiH utjecao je i sukob bivšeg vodstva GKFBiH i Udruge poslodavaca, s kojom sadašnje vodstvo Komore ima dobre odnose, tako da je Federalna gospodarska komora ostala samo s dvije javne ovlasti. Nasuprot trendu slabljena GKFBiH gospodarske komore u RS-u te u Hrvatskoj i Crnoj Gori imaju brojne ovlasti”, izjavio je predsjednik Šantić. “Gospodarska komora Hrvatske svoju misiju obavlja kroz četiri stupnja, a ima čak 18 ovlasti”, kazao je dužnosnik HGK Marko Cindrić. Pavle Radovanović, glavni tajnik Gospodarske komore Crne Gore, kazao je kako crnogorska vlada i ministarstva sve više ovlasti ustupaju Komori. “Kod nas u Crnoj Gori situacija je takva da smo mi prisiljeni odbiti neke od ovlasti koje nam se nude, jer smo preopterećeni”, kazao je Radovanović. “Gospodarska komora RS ima odličan partnerski odnos s Vladom i Narodnom skupštinom Republike Srpske. Mi aktivno sudjelujemo u**

kreiranju ekonomske politike RS, u kreiranje različitih propisa, uključeni smo u različite odbore i komisije Vlade i skupštine”, kazala je Dragana Kokot Gambiroža iz Gospodarske komore RS. Svi oni podržali su zahtjeve Gospodarske komore F BiH za uvođenjem obveznog članstva gospodarskih društava, te za vraćanje javnih ovlasti GK F BiH kakve imaju i ostale komore.

PARTNERI IZ KUVAJTA IZRAZILI POTREBU ZA SARADNJOM SA BH FIRMAMA



“Partneri iz Kuvajta izrazili su potrebu za saradnjom s bh firmama”, izjavio je predsjednik Vanjskotrgovinske komore BiH Bruno Bojić koji predvodi privrednu delegaciju Bosne i Hercegovine u Kuvajtu. Poslovnu posjetu bh privrednika Kuvajtu i njihovo sudjelovanje na Poslovnom forumu i Izložbi bh. proizvoda „Made in Bosnia & Herzegovina“ organizirala je Vanjskotrgovinska komora BiH s partnerom iz Kuvajta (Key Buildings Co.), a uz podršku Ministarstva vanjske trgovine i ekonomskih odnosa BiH i Ministarstva vanjskih poslova BiH, odnosno Ambasade BiH u Kuvajtu. Predsjednik Bojić je izjavio da se susreo s predstavnicima Privredne komore Kuvajta i da su razgovarali o trgovinskoj razmjeni, potencijalima BiH i Kuvajta, te mogućnostima za saradnju i investicije. **“Učinit ćemo sve da istaknuti privrednici Kuvajta nađu načina da uspostave saradnju s poslovnim partnerima u BiH u različitim oblastima privrede”,** izjavio je predstavnik Privredne komore Kuvajta Abdul Wahab Al Wazzan. U privrednoj delegaciji Bosne i Hercegovine su predstavnici kompanija Delibašić Poliuiretani d.o.o., PD Krivaja Möbel d.o.o., Vita-Life d.o.o., Reumal Fojnica, TT Kabeli d.o.o. i Klas d.d, te predstavnici Američkog univerziteta u BiH. Prvog dana posjete, u ponedjeljak Bojić je sa saradnicima i predstavnicima bh kompanija obišao nekoliko kuvajtskih kompanija gdje je razgovarano o potencijalnim mogućnostima za suradnju. U prostorijama Privredne komore Kuvajta danas je otvorena Izložba bh. proizvoda „Made in B&H“ na kojoj su se predstavile pomenute kompanije, dok je na jednom štandu Vanjskotrgovinska komora BiH organizirala katalošku promociju privrednih potencijala Bosne i Hercegovine i kompanija: Hering d.d., Eurovip d.o.o., Krin d.o.o., Hamidović d.o.o., Bosna-S d.o.o., Euroengineer d.o.o., Prograd d.o.o., Zanat, Saraj Komerc d.o.o., Promo d.o.o., Artisan, Rattan Sedia, Lignum d.o.o., Smrčak d.o.o., Hotel Bistrica - OC Jahorina i Hotel Termag.

D.K.



Novosti iz komorskog sistema BiH...

PRIVREDNA KOMORA USK I OPĆINA BOSANSKA KRUPA U PROJEKTU COTON



Između načelnika Općine Bosanska Krupa Armina Halitovića i predsjednika Privredne komore USK Ismeta Pašalića potpisan je memorandum o saradnji u projektu „Coton“ koji se realizuje u okviru programa „Prilika Plus“. Predsjednik Pašalić je ranije, zajedno sa još nekoliko razvojnih agencija iz Republike Srpske, potpisao ugovor o dodjeli granta za realizaciju projekta vrijednog 179.540,00 KM. Općina Bosanska Krupa je samo jedan od lokalnih partnera kojeg je Privredna komora uključila ili će tek uključiti u projekt. Contributing to increased functionality and employability in Republika Srpska and Una-Sana Canton – COTON je projekt koji bi trebao dovesti do bolje saradnje srednjih stručnih škola i preduzeća, povećanja funkcionalnosti praktičnih znanja deficitarnih kadrova u privredi. Trajat će sedam mjeseci, a podrazumijeva kako aktivnosti na terenu tako i monitoring i kontrolu aktivnosti ostalih partnera na projektu. To su i razvojne agencije iz Prijedora, Bijeljine, Zvornika, Istočnog Sarajeva i Trebinja. Tokom narednih sedam mjeseci partneri će obići srednje strukovne škole i napraviti procjenu njihovih materijalnih, tehničkih i stručnih kapaciteta, kao i procjenu preduzeća da bi se znalo koja su spremna da rade sa školama u procesu provođenja učeničke prakse. Privredna komora USK u toku realizacije projekta, između ostalog, ima zadatak da spoji strukovne škole sa privrednim subjektima iz različitih grana privrede gdje će učenici strukovnih škola obavljati praktičnu nastavu. Postignuto održivo angažovanje i učešće poslodavaca u oblasti rada u okviru postojećih industrija, zatim jasno definisani i poentirani nedostaci koji produbljuju jaz između zahtjeva privrede i stručnih škola, te uspostavljeni preduoslovi za obrazovanje odraslih u skladu sa zahtjevima privrede su željeni rezultati projekta. U realizaciju projekta kojeg podržava Vlada Švicarske PK USK osim jedinica lokalne uprave među kojima je i Bosanska Krupa, uključit će Ministarstvo obrazovanja, Službu za zapošljavanje i srednje strukovne škole.

PRIVREDNA KOMORA KANTONA SARAJEVO: „ZAPOŠLJAVANJE“ DEFINISATI KAO NACIONALNI, STRATEŠKI CILJ




Predsjednik Privredne komore Kantona Sarajevo Kemal Grebo i direktor Službe za zapošljavanje Kantona Sarajevo Igor Kamočaji potpisali su u prostorijama Privredne komore Kantona Sarajevo Sporazum o međusobnoj saradnji u pravcu zajedničkog djelovanja na izradi obrazovnih planova i realizaciji projekata, a s ciljem smanjenja broja nezaposlenih, rješavanju problema u ovoj oblasti, kao i ekonomskom oporavku i razvoju Kantona Sarajevo. Sporazum predviđa pokretanje aktivnosti koje će doprinijeti većem zapošljavanju, inovacije, razvoj tržišta rada, pripremu projekata i apliciranje na dostupne strane i domaće fondove i drugo. Predsjednik Komore Kemal Grebo rekao je da je ovim činom došlo do unapređenja poslovnih odnosa između ove dvije institucije, koje dugi niz godina uspješno saraduju. Prema njegovim riječima ključni problem u državi je ogromna broj nezaposlenih osoba i neophodno je da se u strateškim dokumentima, prvenstveno u Strategiji Kantona Sarajevo do 2020. godine koja je trenutno u izradi, kao glavni cilj definiše „zapošljavanje“, kao i koje su to grane i oblasti privrede koje bi generirale povećanje broja zaposlenih u Kantonu Sarajevo. „Nedopustivo je da u Kantonu Sarajevo omjer zaposlenih u privredi i vanprivredi bude 51:49 posto. Stoga, pozivamo Vladu, resorna ministarstva, Univerzitet, poslodavce i druge aktere da zajedno sa nama, uz potpisivanje sporazuma, djeluju na poboljšanje ukupnog privrednog ambijenta i povećanju zaposlenosti“, kazao je Grebo. Gospodin Kamočaji posebno je istakao zajednički cilj na izradi i poboljšanju obrazovnih programa, koji će ubuduće biti strateški, operativni i usklađeni sa potrebama tržišta rada u KS. Prepoznajući Komoru kao ključnog partnera na ovom zadatku u planu je uspostavljanje zajedničkih timova s ciljem jačanja programa prekvalifikacije/dokvalifikacije i dodatne obuke, te sticanja praktičnih iskustava i najnovijih znanja potrebnih privredi Kantona Sarajevo. „Danas je neophodno da svi akteri koji se bave zapošljavanjem, razvojem privrede, stvaranjem jednog ambijenta gdje se može ostvariti određeni uspjeh imaju „totalnu“ koordinaciju. Mi kontinuirano iniciramo ideju da svi akteri kroz javni sektor, ali i privatni budu uvezani u rješavanju pitanja zapošljavanja, koje je danas goruće“, potvrdio je i gosp. Kamočaji. Danas se na evidenciji Službe za zapošljavanje Kantona Sarajevo nalazi preko 73.000 nezaposlenih lica, od čega 61 posto žena i preko 43 posto mladih.

D.K.



Privredne vijesti...

MENPROM OTVARA NOVI PROIZVODNI POGON VRIJEDAN 6 MILIONA KM



Nova proizvodna linija će direktno otvoriti i nova radna mjesta Domaća mesna industrija Menprom privodi još jednu godinu uspješnog poslovanja sa pozitivnim poslovnim rezultatima i napretkom uz izgradnju novog proizvodnog pogona veličine 4000 m², ukupne finansijske vrijednosti 6 miliona KM. Širokoj paleti proizvoda vrhunske kvalitete, uskoro će se pridružiti makro i mikro konfekcija crvenog mesa, te pakovanje svježih oblikovanih proizvoda koje će potpisivati mladi tim stručnjaka i menadžment porodične kompanije Menprom. Završena je prva faza investiranja u novu liniju. Prilikom odabira dobavljača usluga ova kompanije je odabrala isključivo domaće dobavljače koji su ponudili kvalitetne usluge. Na taj način Menprom daje podršku i promovise važnost kupovine / korištenja domaćih proizvoda i usluga, u cilju jačanja privrede BiH kao temelja zdravije i bolje budućnosti. Nove proizvodne linije će direktno otvoriti mjesto za zapošljavanje 20. novih radnika u kompaniji Menprom, a indirektno se očekuje da će biti uposleno i do 2.000 radnika jer će nove proizvodne linije kao i planirani izvoz za Tursku pokrenuti kompletan proizvodni lanac, od proizvodnje stočne hrane do uzgoja i otkupa junadi. Novi proizvodi iz mesne industrije Menprom na tržištu će se naći polovinom 2016. godine, prvenstveno na policama prodajnih mjesta na području Bosne i Hercegovine, a zatim i na izvoznom tržištu Republike Turske.

EKO ŽIVOT: U 2016. GODINI NIŽE NAKNADE ZA AMBALAŽU



Nakon uspješno završene 2014. godine i poslije analize uspjeha u 2015. godini, uvidjevši transparentnost i zakonitost u poslovanju Eko života, veliki broja obveznika je prenio svoje obaveze na Eko život. Sukladno navedenom na sjednici Nadzornog odbora kompanije Eko život održanoj u ponedjeljak 30.11. i razmatrajući izuzetno tešku ekonomsku situaciju i namete koji svakodnevno operećuju privredne subjekte odlučeno je da će naknade za ambalažu od 2016. godine biti manje u odnosu na ovu i prethodnu godinu. Naknade će kao i do sada biti jednake za sve obveznike sistema a što je u skladu sa Članom 15. st. 4 Pravilnika o upravljanju ambalažom i ambalažnim otpadom "Naknade koje će utvrditi operater sistema za ugovorne obveznike sistema trebaju biti jednake za osnivače i ugovorne obveznike sistema". "Zahvaljujemo se svim privrednim subjektima koji su uvidjeli transparentnost i zakonitost u poslovanju Eko život-a te obaveze po pitanju upravljanja ambalažom i ambalažnim otpadom prenijeli na Eko život", kazala je Lidija Tomić, direktorica Eko života, te pozvala sve privredne subjekte da se uključe u sistem upravljanja ambalažnim otpadom preko Eko života, kako bi po najnižim cijenama ispune svoje zakonske obaveze.

POKRENUT STEČAJ U TUZLANSKOM TTU-U



Općinski sud u Tuzli pokrenuo je stečajni postupak u preduzeću Tvornica transportnih uređaja (TTU) u mješovitvoj svojini. Za stečajnog upravitelja je imenovana Alisa Bijedić iz Tuzle. Povjerioci su pozvani da u roku od 30 dana prijave svoja potraživanja stečajnom sudu. Skupština povjerilaca na kojoj će se ispitati potraživanja zakazana je za petak, 22.1. 2016. godine. Tada će se istovremeno, na osnovu izvještaja stečajnog upravnika, odlučiti o daljem toku stečajnog postupka. Premijeri FBiH Fadil Novalić i TK Bego Gutić dogovorili su da će TU ići u "reanimaciju", odnosno da će se preduzeće kroz stečaj rekonstruirati i raditi kao servis koncerna Elektroprivrede i Rudnika mrkog uglja Banovići. Kako je pojašnjeno, tokom stečajnog postupka TTU će se "prepakovati" i napraviti novo preduzeće, koje će kao dio stečajne mase, zajedno saradnicima preuzeti Elektroprivreda BiH i Rudnik mrkog uglja Banovići.

D.K.



Iz Vlade Tuzlanskog kantona...

SVIJETLA BUDUĆNOST MEĐUNARODNOG AERODROMA TUZLA

- Najavljena nova kapitalna ulaganja – Vlada predvidjela pola miliona KM u 2016. godini – Za dodatno investiranje zainteresovani u Privrednoj komori Istanbula -



Premijer Tuzlanskog kantona Bego Gutić najavio je nova kapitalna ulaganja u Međunarodni aerodrom Tuzla. Nakon što je Vijeće ministara BiH na posljednjoj sjednici odlučilo da dodijeli ovom aerodromu dozvolu za kargo saobraćaj- promet robe životinjskog porijekla, pred Aerodromom su se otvorile nove mogućnosti, što je zamah koji Vlada mora iskoristiti i Aerodrom „pogurati” snažnije naprijed. Tim povodom premijer Gutić je kazao da je kantonalna vlada u nacrtu budžeta za 2016.godinu predvidjela pola miliona KM kapitalnih sredstava, koja će biti upotrijebljena za izgradnju pristupnih svjetala. Po dobijanju dozvole za kargo saobraćaj premijer je prisustvovao sastanku Uprave Aerodroma s predstavnicima Privredne komore Istanbula, koja je izrazila interes za korištenje usluga kargo prijevoza Međunarodnog aerodroma Tuzla. Predstavnici najjače privredne komore u Turskoj su izrazili spremnost da ulažu u tuzlanski aerodrom, kao i da Međunarodni aerodrom Tuzla bude tranzitni, disperzivni aerodrom prilikom transporta roba iz Turske prema zapadnoj Evropi. Po riječima premijera Gutića, i Vlada FBiH prepoznala je tuzlanski aerodrom kao strateški projekt, te je naredne godine predviđeno oko dva miliona kapitalnih ulaganja za ovaj aerodrom, što će biti upotrijebljeno za izgradnju nove terminalne zgrade. „**Za dodatno investiranje, ili za pridruživanje ovoj investiciji svoj interes iskazali su i gosti iz Turske**”, rekao je Gutić i dodao da prije tih investicija treba riješiti određene imovinskopravne odnose, na čemu se već radi.

VLADA PONOVO PARTNERSKI DJELOVALA PREMA „KONJUHU“

- Pomoć za penzionisanje radnika – Iako je Konjuh u privatnom vlasništvu, Vlada pomaže u rješavanju problema – Pokazana dobra volja za prevazilaženje teške situacije -



Stvaranje preduslova i pružanje pomoći za penzionisanje pedesetak radnika fabrike namještaja „Konjuh” bila je tema sastanka delegacija Vlade Tuzlanskog kantona i predstavnika Zavoda zdravstvenog osiguranja TK, Kantonalnog ureda Poreske uprave FBiH, JU Služba za zapošljavanje i Zavoda za PIO/MIO sa predstavnicima uprave i radnika privrednog društva „Konjuh” Živinice. „Iako se radi o firmi sa cjelokupnim privatnim kapitalom, koje se u **ovako teškom stanju nalazi upravo zbog neodgovornog odnosa svojih vlasnika, Vlada Tuzlanskog kantona se u rješavanje ove problematike uključila prije svega zbog socijalnog aspekta i zbrinjavanja tih 50 radnika koji trebaju otići u penziju**”, istakao je premijer Gutić. Na sastanku je pokazana dobra volja i želja svih subjekata i institucija koje su dijelom uključene u ovom problematiku da pomognu rješavanje pitanja ovih radnika. Zaključeno je da privredno društvo „Konjuh” u narednim danima treba srediti evidencije koje se tiču, prije svega, ovih pedeset dva radnika, te napraviti presjek stvarnog stanja, kako bi se mogle definirati konkretne mjere i pristupiti adekvatnom rješavanju. Iz Vlade je još jednom istaknuto da postoji podrška i „vjetar u leđa” svim privrednim subjektima koji nastoje trajno i sistemski riješiti svoje probleme i nastaviti put uspješnog poslovanja, ali da Vlada nije u mogućnosti rješavati pitanja i procedure unutar tih preduzeća.

D.K.



Privredna kretanja u Tuzlanskom Kantonu

U periodu januar – septembar 2015. godine, ostvaren je pad obima industrijske proizvodnje u odnosu na isti period 2014. godine u vrijednosti od 0,2%. Privreda Tuzlanskog kantona u septembru 2015. godine u odnosu na prosjek 2014. ostvarila je rast industrijske proizvodnje od 3,5%. U odnosu na isti period prošle godine, prerađivačka industrija ostvaruje rast od 1,7%, dok proizvodnja i snabdijevanje električnom energijom ostvaruje pad od 3,1%, a vadenje ruda i kamena 0,7%.



U periodu januar - septembar 2015. godine iz Tuzlanskog kantona ukupno je izvezeno proizvoda u vrijednosti od 919.107.000 KM što je u odnosu na isti period 2014. godine rast od 9,18%. U isto vrijeme je došlo do rasta uvoza od 12,48% te je uvezeno roba u vrijednosti od 1.065.247.000 KM. Pokrivenost uvoza izvozom je 86,28%, a u istom periodu prošle godine je bila 88,89%. Vanjskotrgovinski deficit je 146.140.000 KM. U odnosu na isti period 2014. godine, došlo je do rasta izvoza hrane i pića od 43,9%, industrijskih materijala za 16,2%, goriva i maziva 12,3%, transportnih sredstava 3,7% i proizvoda za široku potrošnju 3,5%, ali do pada izvoza kapitalnih proizvoda 1,1%. Rast uvoza u odnosu na januar – septembar 2014. godine kod uvoza industrijskih materijala 10,5%, goriva i maziva 14,2%, kapitalnih proizvoda 30,4%, transportnih sredstava 27,7% i proizvoda za široku potrošnju 11,3% dok je došlo do pada uvoza hrane i pića za 2,6%. Najznačajniji vanjskotrgovinski partneri Tuzlanskog kantona su Njemačka, Slovenija, Italija, Hrvatska i Austrija.




Prema podacima Federalnog zavoda za zapošljavanje, u septembru 2015. godine u Tuzlanskom kantonu je bilo zaposleno ukupno 84.303 osobe. U odnosu na prethodni mjesec, broj zaposlenih je veći za 1,1%, dok je u odnosu na prosjek 2014. godine broj zaposlenih veći za 3,3%. Prerađivačka industrija i trgovina zapošljavaju najviše osoba.

	Zaposlenost (IX 2015)	Nezaposlenost (IX 2015)	Prosječna plaća (IX 2015)
Banovići	5.263	5.492	845
Čelić	993	2.651	605
Doboj-Istok	1.665	2.596	524
Gračanica	9.185	9.544	522
Gradačac	7.436	7.435	580
Kalesija	3.533	8.823	592
Kladanj	2.028	2.773	617
Lukavac	8.388	10.660	738
Sapna	592	2.588	775
Srebrenik	5.059	8.659	606
Teočak	454	1.793	734
Tuzla	31.099	20.618	860
Živinice	8.608	14.031	694

Prema podacima Federalnog zavoda za zapošljavanje, u septembru 2015. godine je registrovano 97.663 nezaposlenih osoba ili 0,1% manje u odnosu na avgust 2015. Prema stručnoj spremi, najviše je KV i NKV radnika, a slijede osobe sa srednjom stručnom spremom.

VSS	Broj	VŠS	Broj	SSS	Broj	KV/VKV	Broj
Ekonomist	1026	Nast.raz.nast	93	Gimnazija	3225	Prodavač	5918
Pravnik	828	Ekonomista	55	Mašinsteh	3042	Automehan	2234
Pedagog	312	Pravnik	44	Ekontehn.	2044	Bravar	2120
Prof. bosanskog	272	Ekon.sluz.	22	Ekon.sluz.	1377	Kuhar	1524
Prof.fiz.i zdr.kult.	175	Nast.tehn.kult.	19	Hem.tehn.	1159	Vozač ter.voz.	1513



Prosječna neto plata u Tuzlanskom kantonu u septembru je iznosila 728,00 KM što je ispod prosjeka Federacije BiH. U odnosu na kantonalni prosjek iz 2014. godine, neto plaća je manja za 1,5%. Najviše prosječne neto plate u Tuzlanskom kantonu su u sektoru proizvodnje i opskrbe el.energijom, dok su najniže prosječne neto plate u građevinarstvu.

	Zaposlenost (IX 2015)	TK Neto plaća	TK Bruto plaća
A Poljoprivreda, šumarstvo i ribolov		679	1.013
B Vadenje ruda i kamena		890	1.342
C Prerađivačka industrija		511	756
D Proizvodnja i snabdijevanje el.en., plinom		1.483	2.305
E Snabdijevanje vodom i uklanjanje otpadnih voda		805	1.218
F Građevinarstvo		479	710
G Trgovina na veliko i malo		514	769
H Prevoz, skladištenje i komunikacije		644	966
I Hotelijerstvo i ugostiteljstvo		547	818
J Informacije i komunikacije		1.044	1.611
K Finansijske djelatnosti		1.175	1.824
L Poslovanje nekretninama		605	906
M Stručne, naučne i tehničke djelatnosti		748	1.141
N Administrativne i pomoćne uslužne djelatnosti		563	848
O Javna uprava i odbrana		1.080	1.656
P Obrazovanje		768	1.176
Q Zdravstvena socijalna zaštita		1.024	1.581
R Umjetnost, zabava i rekreacija		732	1.114
S Ostale uslužne djelatnosti		676	1.022

STRUČNA SLUŽBA KOMORE



KANTONALNA PRIVREDNA KOMORA TUZLA
THE CHAMBER OF ECONOMY OF TUZLA KANTON
KANTONALE WIRTSCHAFTSKAMMER TUZLA

WWW.KPKTZ.BA

BUDITE I VI ČLAN



0 KOMORI → PRIVREDA TK → REGISTAR → VIŠE →



PRVA POSJETA MANDATARA GUTIČA KOMORI

Konsultacije sa privrednicima

WWW.KPKTZ.BA

**BUDUĆI PREMIJER SA
PRIVREDNICIMA**



Zvanična posjeta Kantonalnici

**PRVIJE – PRICON WATER &
ENERGY™**



Prezentacija u Kanjoni, 23.



TREĆI JAVNI POZIV



Javni poziv za kandidovanje
Programa uložaka preostalih
ciljeva obnovljive energije, rudarstva i

WWW.KPKTZ.BA



VJESITI

NAJAVE POZIV

Budući premijer sa
privrednicima

05.03.2015.



Usvojen Poslovni plan
2015. – 2019.

25.01.2015.



Inovni i Ekonomski
iskollet

25.01.2015.



Pozitivan primjer

25.01.2015.

Pripreme za 6. SBF

25.01.2015.



TUZLANSKI